



Taslina Nasreen visa
atsulangtsüogo

Autodesk-i Andrew Anagnost tir tasenba
aser CEO asütsü asoshi shimogo

Nagaland nung ITI tasen 2 lapoktsü atema kimung nüngdaker

Dimapur, June 20 (TYO): Ministry of Skill Development and Entrepreneurship (MSDE)-i Nagaland nung ITI ana lapoktsü atema maparen inyaker aser iba atema state sorkar nungi ali indang osang atar, ta Union minister Rajiv Pratap Rudy-i ashi. Mongulbarnü Chumukedima police Guest house nung

osangbener den ajurutepe sensaksem dang Rudy-i iba osang metetdaksü.

June 21, 2017 anepdang 8:30 ako nungi Agri Expo site, 4th mile nung International Yoga Day amungtsü aliba sentong nung adentsü atema Rudy Nagaland-i aru.

(Maneni tapak 11 nung...)

Angh Acharya-i Yoga Day nung shilem agitsü ayongzüker

Dimapur, June 20 (TYO): International Yoga Day nung ni Nagaland nung alir ajak dang Prime Minister Narendra Modi-i tenzüka sentong nung shilem agitsü ayongzüker, ta Nagaland Angh, PB Acharya-i metetdaksü.

meimchirtemi iba ya kanga sapua agizük, ta Angh-isa ashi.

Yoga ajanga tekolok aser temang longjemdaksür aser nübertem o alima tsüngda teputep adokdaksür. Yoga ajanga temang anema yutsür aser tepela agütsür. Anungji, asenok anema alitsü atema asen taküm nung Yoga ya shilem ka kümdaktsüsüla, ta paisa ayongzüker.

Mokokchung-Mariani National Highway indang metetdaksür

Dimapur, June 20 (TYO): June 13, 2017 nü NH702(D) anasa aliba yimtsüng 14 den sorkar tenüng nung ketdangsertem, contractor aser ali kiburtem külem senden ka amen.

amshia lenmang yanglutsü aser bangdak department nungi technical officers-i mapa ketdangsäa reprangtsü telemetba agi, ta Convener Imchawati Kichu aser Secretary Toshimeren nati sangdong ka nung metetdaksü.

(Maneni tapak 11 nung...)

LKM-i L.Panger aser L.L. Yaden senpet agütsütsü

Dimapur, June 20 (TYO) : Langpangkong Kaketshir Mungdang (LKM) tenzüka anogomong amongba den repsema tsürabur lenir ana tenüng nung tentetba L.Pangersowa Trust Award aser L.L.Yaden Meritorious Scholarship agütsüba sentong ka June 22, 2017 anepdang 10:00 ako nungi Chuchuyimlang Town hall nung akatsü renema lir.

nung mendenbuba Wb.Aosanen Pongeni tajungshi o ashitsü. Iba sentong nungsa AKM tir Wb.Imkongwati-i salem o ashitsü aser Unger Kaketshir Telongjemi ken ka atentsü. Iba silen Chuchu town Baptist Arogo nung sannüker Rev.Temjeni kaketshirtem atema sarasademtsüsü.

Iba sentong nung LKM lenirtem den teyariteperitem aser yimtsüng shia nungi kaketshirtem Telongjem ketdangpurtem ajak medema arua adentsü asoshi LKM ketdangpurtemi mepishia metetdaksüogo.

Samaro telok küm 25 ajunger

Dimapur, June 20 (TYO) : Tsüngrem ken mejema atener Samaro telok tenteter küm 25 taküm 2017 küm ajunger aser iba takok asoshi Tsüngrem nem tenüngsang agüja nübertem den pelatepba sentong tesem balala nung agia odagi.

Mokokchung Town Baptist Arogo tenla kidang akatsü sentong renema lir. Iba tenüngsang agütsüba kenten benjong sentong nung tsürabur aser lanurtem ajak arua adentsü pelashishia jaoker ta sentong ayongertemi metetdaksüogo.

Iba tenüngsang agütsüba sentong ka tan June 24 nikongdang 6:00 ako nungi

Ano, MTBA nungsa June 25 Deobar temoatsü sentepa Samaro telokisa bendanga agitsü renemdag.

Union Minister Rajiv Pratap Rudy-i Nagaland Angh den ajurutepe



Mongulbarnü Airport lounge, Dimapur nung Union Minister of State (I/C), Skill Development & Entrepreneurship, Rajiv Pratap Rudy-i Nagaland Angh, P B Acharya den ajurutepe dang agiba noksa ka angur. (Dimapur, June 20)

Dimapur, July 20 (TYO): Mongulbarnü Airport lounge, Dimapur nung Union Ministry of State (I/C), Skill Development & Entrepreneurship Rajiv Pratap Rudy-i Nagaland Angh, P B Acharya den ajurutepe Nagaland nung mapa inyakba indang osang lemsatep.

tebilebatem lemsatep. "Nagaland nung lanurtem dak keta aliba sempet tajungtem onoki ajitetogo aser parnok dak entrepreneurial skills tulu lir. Linük nung sector balala nung parnok ama lanurtem nüngdaker aser onoki Nagaland sorkar den yaritepe lanurtem ajungkettsü atema mapa inyaktsü" ta tanü Rudy-i ashi.

lapoktsü aser pungu Supplementing Deficient Infrastructure kübok lapoktsü osang metetdakja liasü.

Iba mapatong atema sen lakh 1149.47 lezmüktsüogo. Iba scheme kübok Dimapur aser Peren nung ITI ana lapoktsü aser ITI ana atema sen lakh 788.50 lezmüktsüogo.

Skill development mission kübok "Enhancing Skill Development Infrastructure in NE States & Sikkim" aser tanga scheme tem inyakba onüktem tenati benoka jemi.

Acharya-i kanga yaritepba ajanga Nagaland nung ITI aika tentettsü aser skill development o entrepreneurship ajungkettsü atema lenmang lapokogo, ta paisa shisem.

Nagaland kübok Longleng aser Kiphire district tem nung ITI ka danga mali, anungji ITI tasen lapoktsü nung ano tasen ana lapoktsü atema ministry-i mapa inyakdar, ta Union Minister-isa ashi.

Rajiv aser Acharya natasa Nagaland nung skill development rejutem lapoktsü indang

Tawa tu Rudy-i Nagaland nung ITI ana up-gradation plan kübok

(Maneni tapak 11 nung...)

Naga nunger kaketshir ajaki Information Technology metettsüla: Dr. Shürhozelie



Civil Secretariat nung Chief Minister Dr. Shürhozelie Liezietsu-i pa indang office chamber nung Director Higher Technical Education ket nung computer set agütsüdang agiba noksa ka angur. (Kohima, June 20)

"Alima ya digital lima ka akümer, anungji Naga nunger kaketshirtemia tangar sülen anidaktsüla. Naga nunger kaketshirtemi technology ainba den tsüngsü medema anidaktettsü aser tarutsü anogotem nung Naga nunger kaketshirtemi Information & Technology nung tajungtiba akümtsü imlar," ta paisa shisem.

Sorkar college tem nem computer sets agütsüba ajanga sorkar rejutem nung azüngba kaketshirtem computer education nung tashi aittsü, ta Dr. Shürhozelie-isa metetdaksü.

Sorkar indang college tem nem agütsüba computer sets ji Ministry of Tribal Affairs-i senotsü teyari agütsüba ajanga lir.

Computer sets 100 nungi 50 ji accredited government college 5 nem agütsütsü aser 50 ji government college 10 nem agütsütsü.

Kohima, June 20 (TYO): Naga nunger kaketshir shia nem Information Technology indang tesayuba agütsütsüla, ta tanü Nagaland Chief Minister, Dr. Shürhozelie Liezietsu-i ashi.

sorkar college tem nem computer sets agütsüba sentong nung jembidang, Dr. Shürhozelie-i ashiba agi, "Linük indang IT sector nung Nagaland ya jenjang 5 nung lir aser iba jenjang atongba atema IT department dang kanga pelar."

Tanü agiba sentong nungsa Chief Minister-i Kohima Science College, Fazl Ali College, Mokokchung aser Dimapur Government College nem state sorkari bus asem agütsütsü ta osang metetdaksü.

**NÜ VOTE AGI NAI
AGINÜBA AMA NÜ
TAKÜM
YANGLUTSÜSA NÜ
NEM TASHI AGÜTSÜR**



Mokokchung nunga 'World Music Day' amungtsü | Mkg nung NCC Annual training camp agir

Mkg, June 20 : June 21 nü alima rangben nung 'World Music Day' agizüka amungba den külemi Mokokchung nunga WMD nüngtem Mokokchung District Musicians Association (MDMA)-i Mokokchung Cosmos Entertainment Hall nung kenten sentong tajung ka ayongzüka lir.

Iba sentong nung kentener balala shilem agiba den külemi ano MDMA Junior Solo Competition grand Finale-a alitsü aser osang tajung kaji

MDMA züngsentemi atenba kensep (album) ka dena sayatsü, ta MDMA tir Arsashi Ozükümi ashi.

Mokokchung nung nüngtugu band Tune Up Channel, Onus, Beyond Sunday, Mingle Tones, Flamboyant Souls, Mannequin, Rag Dolls, Galaxy Stars, The Great Decade, Trans Ebullient, Class of Music, 4 of Us, Yimjung Ola, Hunting Boots aser solo artist rongnung; Lipokmenla, Imlisenla, Angangla aser Longchameren nungertemi

shilem agitsü ta angazüker.

Iba sentong ya angati dang sayutsü, anungji, music meimer ajak arua iba sentong nung shilem agitsü asoshi MDMA ketdangsurtemisa ayongzüka liasü.

Iba sentong ya nikongdang 3:00 ako shitak nungi tenzüksü. MDMA ya Mokokchung nung music meimertem lungjemer district nung music luyimba ajungketba den sempet aketer lanurtem nem sabang lapoktsütsü nükjidong jur 2016 küm July 29 nü tentet.



Dimapur, June 20 (TYO): Tzünglu arua tsüngsang mejungaka Mokokchung nung anogo 10 nü NCC annual camp agidar aser cadet temi Traffic Rules Lecture cum Practical Class nung denogo.

Iba class ji Sub Inspector C Patton aser par teloki agi aser C Patton-i NCC cadet tem dang road safety aser traffic dak sendakba onüktem nübor nem metetdaksütsü atema ayongzüik.

Tanü nungi First Officer Nokpang Konyak aser 3/O Imtilepba na ketdangsüba

kübok blood donation camp tenzüik aser SD cadet aseme azü tenla.

Maneni, First Officer Tzuwar, 3/O Hontin Konyak aser 3/O Indenmongba na ketdangsüba nung aser PI staff Hav Rajan kübok "Shoot To Win" ta ser firing practice tenzüikogo.

Second Officer Nurul Islam-i RD Parade Delhi atema Arms Drill Squad ka tentetsü asoshi mapa inyakdar. Cadet temi telemsa ajak nung shilem junga agidar aser nikongdang tribal martial dance nunga shilem agir.

Kohima DC-i Gariphema yimtsüng semdang



iba ya ajanga telongjem indang tatischitsü tajung sayur, ta paisa ashi.

Soundararajan-isa Coffee Plantation Farm semdang aser iba mapang Joint Secy. Department of Land Resources, ADC Chiephobozou, SDO Civil Chiephobozou, District Land Resources ketdangsertem aser tanga district ketdangsertemi pa meina liasü.

GVYO President Kezhangulie Kire-i ketdangsüa Gariphema nung Coffee Nursery lapokba, Coffee lu ayimba maparen ajungketba aser Land Resources Department ajanga coffee metsü agütsüba atema Kohima DC-i pa nem tenüngsang agütsü.

Ketdangsertemisa Trinitarian spot, open amphitheater aser NCRC archive museum tem semdanga liasü.

Kohima, June 20 (TYO): Women ' aser 'One Church, Kohima Deputy Commissioner, Rajesh Soundararajan-i Honibarnü Gariphema yimtsüng semdang.

Gariphema yimtsüng ya India nung mezüngbuba 'Tobacco free', 'Declaration of Elimination of Violence against

Women ' aser 'One Church, One Administrative Council' narokümtem anguba yimtsüng lir aser iba atema DC Soundararajan-i tenüngsang agütsü.


Maneni, Gariphema ya Angami aser Sema nunger temeyoktep yimtsüng ka lir aser

ANCSU Executive Council senden amentsü

Dimapur, June 20 (TYO): June 22, 2017 nü All Nagaland College Students' Union (ANCSU) kümsük 2015-2017 atema 11 buba Executive Council senden amentsü, ta Publicity & Information Secy., Imnameren N Jamir-i sangdong ka nung metetdaksü.

Sendenji anepdang 11:30 nung ANCSU office nung agitsü ta Imnameren-isa tribunals aser executive züngsem ajak dang metetdaksüogo.

Iba senden nung tribunals aser executive züngsem ajak arua adentsü mepishir, ta paisa shisem.



YOG - INDIA'S BOON FOR THE WORLD

On the occasion of
International Yoga Day
 (June 21st, 2017)



YOGABHYAS

Chief Guest
Rajiv Pratap Rudy
 Union Minister of State Skill Development & Entrepreneurship (IC)

Date: June 21st, 2017 Time: 07:00 to 08:00 a.m.
 Venue: Lions Club, Dimapur, Nagaland

*"Yoga is not just about getting rid of diseases, but it is a guarantor of wellness."
 - Narendra Modi*

Saath Hal, Vishwaash Hal ...Ho Raha Vikas Hal

Mizoram tzümetsüing aser anentsü lendong nung nisung 12 süogo



Kawlkulh tesem anasa tata gari ka lishi nung asonger aliba yangi angur.

Aizawl, June 20 (Agencies): Tzünglu kanga sashia aruba ajanga June 9 nungi tenzüka Mizoram nung tzümetsüing aruba aser anentsüh aluba agi tang tashi nung nisung 12 tepsetogo aser nisung aliba ki 877 raksatsüogo, ta ketdangser osang ka ajanga tanü metetdaksü.

Mizoram State Disaster Management aser Rehabilitation department-i June 9 nü nungi tenzüka osang bendena ayuba nung, Lunglei district kübok Tlabung sub-division meketa aliba tesem nungi arishi küm 3 tanur ka dena parnok 10 süogo aser anogo 11 tsüingda nung anentsüh aluba aser tzümetsüing aruba ajanga Aizawl aser Serchhip district na nungi nisung kaka süogo.

Parnokisa ashiba agi, tzümetsüing aser anentsüh

ajanga tang tashi nung ki 877 raksatsüogo aser item rongnungi 220 bo kanga mejungi raksaogo aser 657 terara raksar lir.

Tesem ajak rongnung Lunglei district kanga mejungi kongshir lir. Iba tesem nung ki 165 khenyongi raksaogo aser 299 terara raksar lir. Iba sülen Lawngtlai district nung ki 51 khenyongi raksaogo aser 280 terara raksar lir.

Iba den külemi Siaha district nung anentsüh ajanga ki 4 khenyongi raksatsüogo, ta ketdangsertem osang ka ajanga metetdaksü.

Tzünglu kanga sashia aruba aser anentsüh aluba ajanga Aizawl district nung ki 65, Mamit district nung ki 14 aser Serchhip district nung ki 9 ta, terara raksatsüogo.

State tesem balala nung aluyimba li hectare 137

tzümetsüing ajanga raksatsüogo aser Kolasib district nung ango tzübo 62 raksatsüogo.

Tanga osang ka ajanga ashiba agi, tzümetsüing aser anentsüh ajanga kibong 2000 dak tali dak kongshiogo aser Bangladesh arrtsü anasa aliba Tlabung sub-division nung tzümetsüing ajanga ki 30 dak tali aponger ogo.

Mizoram sorkari iba tensa asadangtsü atema Bodhbarnü Home Minister R Lalzirliana lenisüba kübok High Level Committee ka dentetogo.

Kasa mapang nung NGO tem; Mizo Zaimi Insuikhawm (MZI), Mumbai nung amenoker aliba Getto, Delhi nung amener aliba NGO Goonj aser London nung Salvation Army International Headquarters ajanga Mizoram nung tzümetsüing agi kangshirtem yaritsü asoshi sen bendentar.

School amenoktsü atema süngo lu nungi ali meshir

June 20, 2017 (Agencies): Assam Education aser Health minister Himanta Biswa Sarma-i tanü ashiba agi, süngo lu shia nung high school amenoktsü aoshi ali acre kaka mekazüktsü atema sorkari bilemdangdar.

Süngo lu shia nung High school amenoktsü asoshi ketdangsertemi süngo lu

ketdangsertem dang ali meshia liasü, saka parnoki memolungba ajanga iba sentong ya asadangdar, ta Sarma-i ashi. Assam nung süngolu nung inyakertem atema healthcare facility tajungba agütsütsü asoshi Mobile Medical Units (MMUs) lapoktsüba sentong nung pai iba olen ya ashi.

Pai sa ashiba agi, sorkari school amenoktsü asoshi süngolu nungi ali tila ka meshirba dang lir. Maneni government medical college tem nung süngolu nungi kaketshirtem nem MBBS courses atema quota 8 agüja aliba nung 18 kümtsüba ajanga iba lokti tali ajangzüktsü, ta Sarma-i ashi.



Agartala, June 20 : Tzünglu kanga sashia aruba ajanga Howrah ayong anasa aliba tesemtem metsüingbangoga. Ketdangsertemi nüburtem anienba mapang tangokba noksa nung angur.

Darjeeling nung mepetmesü ajanga Sikkim ajangzükter

Gangtok, June 20 (Agencies): Raliwalirtem kanga dang bulua senzüba mapang ka nung Darjeeling nung mepetmesü adokba ajanga Sikkim nung raliwaliba ren nung terenlok bener arutsüogo.

Sikkim Tourism Secretary C Zangpo-i ashiba agi, "Darjeeling nung mepetmesü aliba ajanga idaki ajungbena dang raliwaliba ren nung kanga ajungketogo. Gangtok nung raliwalirtem anendak ajak süngadokogo aser taruba anogo temaa mekaadokogo."

GJM puri anir Darjeeling nung longkak aitba ajanga bendanglen aser linük nungi raliwalirtemi aikati iba jila semdangtsüba sentong thiogo

Sikkim Tourism secretary ajanga ashiba agi, Sikkim semdangba raliwalirtem timbaka Darjeeling semdangtsüba asoshi sentong liasü mesüra parnok idak nungjiagi Sikkim-i arurtem aika lir.

Secretary aser Travel operator temi Raliwalirtem paika ya mapang ka nung anepalutsüba nung timtem ajuruba shisema laisü.

"Onoki travel operator aser hotel anepalurtem dang

raliwalirtem takok tashi anendaksütsü asoshi merangtsüba metetdaksüogo aser iba maparen inyakba mapang nung tourism industry tenüing meraktsüsü takok tashi anepaluba yimya jenjang tamajungba mekümdaksütsü merangatsü asoshi shiogo," ta Zangpo-i ashi.

Hotel temi tanendak mekar tasentem thitsü tenzüko kechiyong hotel tem July ita tom tashi mekaadoker lir.

Sikkim nungi raliwalirtem nem anogo shia security den Sikkim Nationalised Transport bus tem agütsür koba ajanga parnok anisüingzükter aser lentom nung maneni senzüteter.

Osang ka ajanga ashiba agi, Sikkim sorkari June 18 nü West Bengal sorkar dang Darjeeling district nung NH 31A adena senzürtem nem tekümsükba agütsütsü asoshi mepishiogo. Iba dak sendakba nung West Bengal sorkari Sikkim-i aoba gari ajak nem security agütsütsü asoshi nangzükogo.

Darjeeling district kübok Sevoke aser Gangtok na km 92 NH 31A agi sendaktepa lir aser iba lenmang ya Sikkim nung atema tongtibangtiba lenmang lir. Iba NH km 30 shibo West Bengal adena süier.



Guwahati, June 20 : Tetsür ka shiti tepong ka tasü mang tsüing dang sarasademba noksa nung angur. Forest official temi ashiba agi shiti ya Guwahati tezülen tzülu nung electric shock süa asü.

Tripura nung nisung 423 samar monguteter

Agartala, June 20 (Agencies): Tripura nung 2014 January nungi tenzüka küm asemser tasadang ka tsüingda nung tanur 23 densema nisung 423 samaar monguteteri lir. Police temi tanü osang ka sangdongba nung ashiba agi, 2014 January nungi 2017 May 31 tashi nung nisung 467 samaba keno Tripura nung police station balala nung benoka lir, item rongnung 2014 küm parnok 126 sama, 2015 küm 153 sama, 2016 küm parnok 139 aser tanü tashi nung

parnok 49 samar monguteter. Ajisüaka nisung samaba ken o benoka aliba rongnung parnok 423 tang tashi kechi nung alia mejangjateter aser Supreme Court guideline nung aliba ama tashiyim agi puer aoba ken o ama parnok ken o tem benoka lir. Police temi ashiba agi, item nisungtem bushitetsü asoshi parnoki takoktashi bushisüingdangdar. Maneni samara alirtem rongnung karbo state adena pei poksüing aatsü asoshi ayangi or alitsü ta temolung melemi bilemer.



TIR YIMYIM YIMOBILEM (EDITORIAL)

DIMAPUR WEDNESDAY, JUNE 21, 2017

Lenirtem akümtsübuba

Naga nunger yimten nüchiso bushirtem telok aika kuma lemsar liaka, Naga nungertemi parnok lenirtem nem kasasa akümtsübu agütsüba mapa yagi Naga nungertem asoshi telatetba ka dang nungdaker ta sayur. Tan mapang tatsüka tsüngda NSCN-IM tir Wb.Isak chishi Swu asüba sülen NSCN-K tir Wb. S.S.Khaplang süogo. Tena ya NSCN metenzükdang Naga National Council (NNC) nung lenir süa Naga nunger yimten nüchiso asoshi timtem aika ajangshia linük tenzüka arurtem lir. Naga nunger tia majung 1975 küm Shillong Accord yangluba sülen NNC nung lenirtem kari NNC toktsür NSCN tenzük aser ano kopi melii NSCN telokjia ana aküm aser ano tangbo NSCN telok pezü kümogo. Item ajakji lenirtem rongnung kati ka dak temulung melemteti akümba ajanga atalokogo. Iba ama telemsa adok shia Naga nunger o Naga nunger na tsükchir danga tamajungba kuma azü tokshiba anogotem aser mapang tamajung aiben ajangshio. Iba mapang tai aketer aser maketer mebendang Naga nunger nisung aika taküm samaogo. Naga nunger yimten otsü nung itemji tesasatsü aser tejashitsü otsü asütsü. Ajisüaka, item tesasatsü mapang aser mapatemji tesülen yutsür, tanübo telok aika lemsar liaka yimjung nung pei pei akok yimten tebilemtsü ya tatem kuma telatetba ka dangi arutsü merangba mapang lir. Iba ama mapang, NSCN lenirtem asüba mapang nübortemi asür nem akümtsübu agüja sentong tapu balala ayongzüka agiba yagi Naga nunger telok telemsa aika liaka telatetbabo ka dang nungdaker ta sayur. NSCN-IM lenir Isak Chishi Swu asüba mapanga nübortemi kanga akümtsübu agüja meinoktsüogo aser ano tang NSCN-K lenir Khaplang asüba mapanga Eastern Nagaland nung dang masü saka Western Nagaland tsütsüa Kohima aser Dimapur nung NSCN-K lenir nem akümtsübu agüja sentong balala ayongzüka amongba jagi Naga nungertemi India dang Naga nunger taginüba aser tangatetba ka sayuogo. Talisa, Khaplang-i aniba NSCN telok den yabo India government yimjung nung mali, anungji India government o NSCN-K na tsüngdabo tsükchiteper. Ibayongji, Nagaland chief minister, Shurhozeli-i Khaplang asüba atema mangyim jashi aser tesasaba ken o lemsatepba osang ka metetdaksüba sülen television channel karibo Nagaland chief minister-i kiralongrar ka asüba atema mang ayimer ta aitsü. Atangji, NSCN-K telok ya India government den yimjung nung maliba agi television osang abeneri yamaji bilem südi. Ajisüaka, Naga nunger asoshibo Isak chishi Swu o S.S.Khaplang na prongla Naga nunger asoshi taküm tepiyong taküm tenla agüja tenzükertem liasü. Iba jagi Naga nungertemi tenaprongla nem kasasa akümtsübu agütsüogo. Aji oda, Isak chishi Swu tenla medeniang NSCN-IM telok ya tang atongba jenjang nung ya melila. Iba amaji S.S.Khpalang tenla medeniang Myanmar nung Myanmar government-i Naga nunger akümtsübu züngshitsüa jenjang ka mengutetla. Iba amaji parnok ajak dak pei pei yari tashimait liaka parnok aliba ajanga tanü Naga nunger yimten nüchiso aser temeten onük mesamai alima ajunga nung jembir. Aji oda, yimten nüchiso manguyonga alimai Naga nunger meteta akümbaji item lenirtem ajanga lir. Ibaji asenok asoshibo takok tuluka asütsü. Iba ama asenok lenirtemi tarutsü Naga nunger lanurtem asoshi alima nung jenjang kabo alangteta yutsüogo ta bilemdi. Iba tangatetba nung Naga nunger longjemer yimten telatetba ka asoshi jembitsüla. Talisa tang NSCN-K lenir sür külen Naga nungertemi pa nem akümtsübu agüja mangyima amongba jagi NSCN-IM telok o India government na Naga yimten tebilemtsü latettsü asoshi ken o benoka jembidang tangatetba tasen ka agütsütsü imlar. Iba tangatetba tasen ka jagi Naga yimten tebilemtsü ya ajaki agizüktettsüa ajaki shilem agia telatetba ka dangi arua jembitettsüa shisatsü tajung kabosa agütsütsü ta imlaseta atar.

OLEMSABANG

Pei Temeten Jangjaba Mapangji Election

- S. T. Yapang Lkr. Kohima

(Taoba adok nungi...)

Okadak jembia aodang kodang yimden jaki makoktsüsa mapang jagi bener arudir Arogopur taitokteper lungjema alitsü ayongzüka sarasademi arutsü akok, saka idangji "iba keno takok ngua otettsü aser iba jagi asen lima teti asoshi election sünepa agitettsü asoshi nenoki sarasadem nung nungitdaktsünür" ta dang ashitsüla, kechiyong ibai teti ki arungba mi benseper, saka miji koma süra adokar tarutsü nung madoktsüsa inyaksangshi mesünürba mesüka arogo tiyongi aitdang taitoktep alir; koba ajanga tanü tashi asen lima nung election temli yimden ajanga "tan election nung aibelenbatem aser yimtak nungi jentoka alirtem meyipa agir" ta sangdonger, saka ano taruba election-ji tamajungba dang kümdaktsür.

Yim ajak nung kasa benshir ta masü, saka yim aika nung yimer senso candidate-ji dang yaritsüla aser pa asoshi dang sarasademtsütsüla ta par yimer arogoji iba tangatetba nung nokdaker, yangji manidaknürji aibelen ka amai arogopur jagia bilemer.

Ano election nung ne vote yimtak züluoka lir, na maoyonga yimeri ajentsütsüji ta sür mao nung 'Clean Election' ta asübaji aji masü, nesasa ne vote-ji nai mulungba nung ajentsütsüla. Nai aji agi aotsü memulungra tekaraba nung ne vote-ji na aliba tesemi belentsü junger. Anosa tesüngmangtsüji yim ka indang senso candidate-ji election-i mair yimer jagia pa/laji yaritsü ta sangdonger, ibala melen election nung tokteper malir yim jaki "tangar yimer senso candidate-jibo meyaritsü" ta dang sangdongtsü langa lir.

Metsü mapang pako ozü asar ama June 7, 2017 anogo Nagaland chief secretary sangdong NO.ELE-SVEEP-GEN/19/2017/251 ajanga election timi agitsü tetuyuba sangdongba asenok ajaki nguogo, yangto tangatettsü tongmelang agi yamai;

Linük temzüng 326 nung India senso ajak nem temeten kasasa agütsüa lir.

Anosa Rule 39 Conduct of election 1961 nung Vote ajenba/agütsübaji shinga nema memetetdaksütsüla.

Anosa Representation of the People Act 1951 nung Booth rakzükba/amakbaji tepuokdak küm ka dang tajemba mayutsüla aser ibaji küm asem tashi atsülangtsü akok.

Aser anosa nisung ka mejeta yaritsü asoshi yim/ kiyong/ mesüra lokti tentet kati lemteta nübur dang sangdongba ajaki tekalen shia aliba linük temzüng nung aibelenba ta züngoker"

Pai sangdongba ya tang tasen lateterba masü, saka asen lima nung aibelen liaka aibelen masür jaki okadaki maor, anungji aibelen jagiang yimden tashi aser tenüng amer tashiyim mapaji sadema inyaker aser parnokji ang temeten akaba nübu kümdaktsür, anungji tang asen jakdang anetaka akaba election ya magitettsüsa ka arura aji junger, saka agia otetera ibaibo pei temeten jangjaba aser wazüka ayuba election ka südaktsüdi.

Tatensa tang ABAM aser NBCC ajanga nübuttsük aser anibelem jenti agia election ochishia agitsü sentong balala ayongba ya takok ngudaktsütsü ajak khuret südi, kechiyong NBCC aser ABAM-ji tangar masü asenok lir, aser ano arogotemi item ya bendenloka agitet nung koda jungla ta nibo bilemer;

1. Clean Election asoshi shirnokisa peisasa angateta tenangzükba agia ABAM aser NBCC-i lemyonga aruba nung shilem agia meyonngem agütsüogo, parnok tenüngji arogoi züludener ita nung khen mesüra akokeribo Deobar shia asüyonga sentep tiyong nung mapang tatsüka agiteta arogo tenzükker ajaki iba shiti nungji nemeta sarasademtsütsü, kokra tenünga zünga ashiyonga tajungba dang.
2. Shirs Clean Election asoshi tenangzükba agidir arogo tenzükkeri anir par kishi anasa ajaki angutsüba tesem ka nung clean election tamaitsü shiti tajung ka tim o zülur nemeta sarasadema mataka yutsütsü, süra election-i inür mesüra par telok arudang ibaji tamaitsü ka alitsü aser kibur jagia kodaka ang aibelen mesütettsü.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

KHRISTAN TAKÜM NUNG TONGPANG RARA

~ L.Kika Pongener Aoyimkum,Dimapur.

Mathi-10:34. Alima nung yimjung adokdaksütsü ni aru ta tebilem yimjung masü, saka nok adokdaksütsü ni aru. Yisu Khristaji yimjung chuba chir aser nisung ajak asoshi osang tajung bener arur, ta Tenyartemi sannükertem dang sangoktsü (Luke-2:10). Saka Mathi-i züluba osang tajung nungjibo Yisui pa yimjung adokdaksütsü masu, saka nok adokdaksütsü aru ta shia angur. Yisui shinübaji Khristan taküm ka nung anogo shia tongpang rara ajurutsü, aser ibaji tanga alima rara masü, nisung o nisung na tsünga raraba masü, saka ochi o tiyazu na rara, tajung o tamajung na rara, shidak o meshidak na rara, ibala tongpang rara ka indang ashirba lir. Yisu iba limai arubaji ibala tongpang raraji bener aru, aser pai iba rara madak takok angu. Tenyar Paul taküm nunga ibala tongpang rara ya teti ajurua liasü. Rom-7:15. nungji zuügra- Kechiyong ni kechi inyaker aji ni memetet; kechiaser ni kechi inyaksü mulonger aji meinyaker, saka ni kechi sempar aji ni inyaker. Paul Tsüngremi balaka jatetba tenyar ka süaka pai-a anogo shia Tsüngremi mulongba ama alitsü merangka, aiben tang iba tongpang rara ya ajurua liasü, aser aiben pai tajung inyaknür saka mojingi songtemer, aser pai kechi meinyaknür ibaji tang inyaker alir, ta asenoki laishiba nungji angur. Ajioda Khristan taküm ka nung aiben iba tatidang tongpang raraji ajurur, Tsüngremer mapa nung toklanga tenzükertema süang, alima lokti mapa nung tenzükertema süang, kecha nunga metenzük-aka Khristan tamangertem ajak anogo shia iba tongpang rara nung nokdaka lir. Yamaji kodang asenoki mapa tajung inyaksü bilemer, idangji mojingi yakta dang tamajung ka agi nokdanga-adoker. Kodang yimden, arogo, loktiliba aser kibong nung mapa tajung kar inyaksü apusodir, idangji teti tenokdangba tesashi kar arur, aser aji tanga kecha masü, saka mojing sentonga ta asenoki metettsüla, aser ibaji akoktsü merangtsüla. Koba mapa tajung lir, aji inyaksü asoshi lenmang kanga temesü ajurutsü mesüra tenokdangba jenti ajurutsü, saka koba mapa tamajung Tsüngremi memulongba mapatem lir, itemji inyaksü atemabo lenmangji sadem sadema dang lapoktsü. Kodang ochi jembidi ta südir, lenmang aisü nung tetsükdaksü, takoksa aser tetsübutüsü ajurutsü. Anungji asenoki metetsümong-aka ochiji paitoker tiyazü-ang jembitsüsa akümer. Aiben tang asenoki shidakba inyaksü mulongteter, saka kodang asenoki shidakbaji inyakti ta südir, taküm nung, lokti nung aser kibong nung tetsükdaksü, tenokdangba aser nüngsen-nüngmen jenti ajurutsü. Saka meshidak inyaksü atemabo kecha tenokdangba makai sadem sadema inyaksüsa lenmang sadem sadema lapoka akar. Galatia-5:16-21. Saka nenoki Tanela agi jajang, aser shi tejangrabatemji tatalokdaksü, kechiaser shi tejangrabaji Tanela anema lir, kechiyong iba anaji kati ka anema lir. Anungji nenoki inyaknüba amaji nenoki meinyakteter. Saka nenok Tanela nem anidaksüra nenok ozüng küpok mali. Saka shi mapatem jungkai adoka lir, itemji ya; nuktapangda, memerükba, jabujariba, süngyanglu külemba, arasenba, tsükchitepba, rarabangsen, tenükmerem, mit adokba, pei ajung asaba, obang mapu, lemsatepba, tenükshiba, tepsetba, yi agi mesepba, kimakba. Anogo shia Khristan taküm ka nung itemla anema tongpang rara ya ajurujen ajurur, aser rarajen rarar. Asenoki item tamajungtem nungi pila-a alitsü meranger, aser paitoktsü merang-aka, mekokteti item tatidang nungji metsüdaker alanger. Anungji iba tongpang rara nungi takok angutsü atema hadirji tanga nungi masü, saka Tsüngrem o koba Tanela nok lir iba nungi agitsüla. Asen yimden, arogo, lokti, kibong aser kija taküm Tsüngrem o nung amendaker, Tsüngrem o nem anidaksü nungdang item tatidangtem koktetsü, aser iba tajung o tamajung na raraba tongpang tesashi madak takok angutsü. Saka alima rongsen, alima tashitemetet, alima shisatsü aser lokti tulu bangjemer nokdakba tashi agi iba tongpang rara yabo makoktsü.

(Maneni taruiba adok nung...)

ANOGO ABEN TSÜNGREM DEN

AN I AKONGBA

Idangji pai atakatemsü aser azüngashitsü tenzük. Nisungji ni memetet. Aser idangyongji an ia akong. Aser Yisui an i makongdang, nai ni asemen menanzüktsü, ta ashiba o ji Peteri bilemtet. Aser pa tugua kanga ajeb. Mathi 26:73-74

Peteri Yisu asemen menanzük. Mezüngbuba Peter telanzüba tatemzükba: "nai ashibaji ni memetet." (t.70). Tanabuba tenanzükba nung pai azüngashia ashi, "Nisungji ni memetet." (t.72). Tasembuba nung, pai atakatem aser pai Yisu memetet ta ashi.

Terenlokji repringang. Pa tatemzükba ashi, aser idangji ain adok, aser atakatema sangdong. Asenok taküm nung iba ama temenen mali na? Iba tila ka nungi tenzüktsü aser mezüngmeshitsü tenzüktsü, aser ain adoka mang ayangba nung atemtsü.

Ano asen kotaker Tebu asenok dang taochi sayua aser tatok agüja tepela taküm lidaksünera. Asenoki kechi inyaker, kwiben inyaker mesükshir. Pai asenoki ayimtenba angashir- tejashi aser tatok meshiba. Ibaji Tsüngremer yimya lir. Na kong tanelaren chiyongtsü angutsü kodanga tamatok.

Asenoki Tanela Temeshii melenshitsu nung asenok temulungjang lapoktsüdi. Asenoki temenen renlokdkaja iba jagi asen taküm kangrepa mekümdaksüli. Teyari aser tashi meshia Tsüngrem dangi meyipbaji lemang tajungtiba lir. Tsüngremi asenok toktsür ta masü, saka asenoki asen sasa Tsüngrem toktsüba nung teti lendong lir. Iba na kanga senti. Angang, agüjang, anidakang.

Oba, ni ne ola angatsü aser na menanzükba toktsütsü, ne den telungjem raksatsüba mapa aser mulungsentsü ni toktsütsü.

Pastor Judah Smith-i Justin Bieber tenüng asanger



Judah Smith aser Justin Bieber

Seattle, June 20 (Agencies): Biebei-i Instagram nung zülu. Kentener Justin Bieber-i pa sempet Tsüngrem atema amshiba aser pa tamang akangshitsü merangka atema "The City Church" pastor Judah Smith-i tenüngsang agütsü.

Hokolbarnü Smith-i Instagram nung pa aser tangartem Justin Bieber indang kenten sentong repringang agiba noksa ka sayu.

"Yasüng ni Justin Bieber-i pa indang sempet Tsüngrem nem bendanga agütsüba aser tangar tanüla ajungketba angu. Justin ni ka meimer, nai nü tamang akangshitsü merangka atema kanga pelar" ta Pastor Smith-isa ashi.

"Anogoshia asenoki tajungba kümdaksütsü merangdi aser asenok arishi küm 70 ajungdang, Yisu akhümtsübuba, bendanga agütsür aser taochi agi sünga aliba taküm ka ka asütsü merangdi" ta paisa ashi.

Justin Bieber-ia Smith indang noksa aser tezüluba tanaben repost asü aser "Better at 70" ta züluba tattoo indang noksa ka sayua liasü.

"Ni kü taküm nung süia arubatem meyipa repringang, ni aibelenbatem, kü dak temulung malembatem bilemteter. Ni amajok nung mapang aika endokogo saka ni tajungba kümnür. Ni anogoshia tajungba akümstü meranger aser arishi küm 70 nung tajungba kümer alitsü meranger" ta

Biebei-i Instagram nung zülu. Pastor Smith-i küm 10 tejaklen Justin Bieber den metettep. Justin tetsü Pattie Mallette-i pai jembiba onüktem aser mungdang ka nung ajurutepba sülen, lai Smith dang lar jabaso (Justin) mejanga yokdang pai jembiba o angadaksür ta ashi.

Iba sülen lai tena ajurutepdaksü aser tena tesentaktep kanga junga aküm.

Seattle nung aliba City Church nung pastor Smith-i aniba sentep aika nung Justin-i denyonga arur.

Canada nung kenteneri anogoshia amai Pastor Smith dang text asür aser pai Laishiba tekongtem yokba dang masü saka ajungmesoba olentem yoker, ta Smith-i ashi.

Justin-i tawa pa indang Khristan tamang atema kanga odia jembir aser tawa tu One Love Manchester kenten sentong nung, ammannang tia aser temenen madak Tsüngrem tajung dang inyaker aser Pai Pa nübortem meimer, ta metetdaksü.

"Alima nung kechi atalokdir atalokaka, Tsüngremi teti tajung dang inyaker. Ni iba teimla mesamadaksütsü, ni iba temeim kü dak nungi moudaksütsü, ni Tsüngrem metoktsütsü. Tsüngrem yangi asenok den lir aser Pai na meimer aser Pa na atema arua lir" ta Justin-i kenten sentong nung ashi.

Pakistan nunger South Korea nunger missionary mapa inyakba atema apu

Quetta, June 20 (Agencies): Pakistan nung taoba ita China nung ana tepsetba dang oshi sayur South Korea nung Khristan ka police-i puogo.

Pakistan nung police-i iba nisung indang kinungertem dena puogo. Pai China nungertem Pakistan nung Khristan missionary mapa inyakdaksüba atema tai tongloksü.

South Korea nungbai lapokba school ji Pakistan kübok Quetta nung lir. Pai Pakistan nung küm trok tashi liyonga arur.

Taoba hopta Li Zingyang (24) aser Meng Lisi (26) na Islamic State kiralongrartemi tepset. Tenati business visa bener missionary mapa inyaker ta osang angazükba sülen tepset.



Dimapur Ao Baptist Arogo Fathers School tenzükter 25 buba, June 15-18, 2017 tashi Satsükba Baptist Arogo nung "Kibuba, Ni Tebu ka lir" omen nung ajemdaker Asso. Pastor Rev. Wati aser Asso. Pastor Toshi tenati anir parnok pezü lenisüba kübok tebutem 37 tashi dena kanga dang temoatsü tulu nung takok ngua liasü. Satsükba Baptist Arogo-i kanga pelaba den Tsüngremi nenok tali moajangma ta lemsateper, ta Satsükba Baptist Arogo sannüker Temjen-i sangdong ka nung metetdaksü.

OLONG PAITEP # 4458

1	2					3			4	
						5				
6				7						
								8		
9		10				11				
				12						
13								14	15	
	16								17	
18										
				19						

TIPILEN

- 1. Pongentsür nungja
- 5. S _____ prang
- 6. Ammang ozü
- 9. T ___ dak
- 11. Mi nung atsük
- 12. Tar talang aküm
- 13. Tejen masü
- 14. M ___ ng
- 17. Songtem
- 18. Ken olasü
- 19. Kümtdakba

LANGTSÜNGLEN

- 2. Teimla ayu
- 3. Ajir / Penzür
- 4. T ___ k
- 7. Tali anguba
- 8. Tema tajitsü
- 10. M _____ ktsü
- 15. Apitet
- 16. Shishilemba dang amshiba

OLONG PAITEP # 4457 TELANGZÜBA

TIPILEN :

- 1. Chisang, 4. Ait, 7. Odi, 8. Nangri,
- 10. Angur, 11. Aiben, 17. Temeim,
- 18. Tan, 19. Moa, 20. Takdang.

LANGTSÜNGLEN :

- 2. Indang, 3. Nungo, 5. Tain, 6. Ana,
- 9. Ama, 12. Balala, 13. Nao, 14. Sempa,
- 15. Atem, 16. Ken.



TEKÜMZÜKER SHINGO-ANG KÜMZÜK

Alokba : Tanurtem, nenoki onok ama tambur asoajen tajung tobur tajung akümstsü puangma no!!!! Tanü asüng nenok lanuri sobaliba awashi memetetako.... Salaaaa!!

Tanurtem : Tambu!!! Na tepenjem mapang atalokba otsü tu bilemtetangma!!

Alokba : Ari!!! Kua kü indang kechi otsü shiangjo?

Tanurtem : Tambu Hosa!!! Kenü nai arem nung sang ayuba nung shingo ka ashi aser nai shingoji aputsü meranga nema atsütepa alidang yimer kari ngua na kümzüksü merang, saka ne dak ang tasütsüsa atep, sakabo shingobo parnoki kümzük ta asüba otsü tu koda!!!! Süra nena rongnung shiba soro tajungba liasü??

Alokba : Nenok yang nungi oadokang!!!!

Lilir: I. Kilang Ajem, Indisen Dimapur

TANÜBO NAI LANGZÜANG

Q. 'Jigme Dorji National Park' ya koba linük nung lir ?

- [A] India
- [B] Bhutan
- [C] Nepal
- [D] Myanmar

===== (Taruba adok nung onoki langzüksü)

YASHI ADOK TELANGZÜBA : Tamil Nadu

Happy Birthday

TENÜNG : IMONENLA
 Tasoba : June 21
 Küm : 4
 Class : Nursery
 School : Greenwood School
 Talidak : Imkonglenden, Dimapur.

Tenur Anenla, HAPPY BIRTHDAY salem nü dangi odi onok ajaki abener. Yaküm küm na asoba anogo nung tenüngsang agüja taküm asoshi arishi meshia sarasadema ataba ama Tsüngrem tajungi moatsü nung tenüngsang tulu agütsür. Tsüngremi jala Anenla ajemalua pa sentong angateta aienba taküm südakjang ta onok ajaki sarasademtsür.

- Nüdi nunger, Mr. Toshiba, Apong Aier, Moaba, Alongba.




Tepela Tasoba Anogo

Tenur asoba anogo nung salem osang den noksa angati adokdaksünürä - Tenüng, Küm, School, Talidak & salem osang tepela züfur, noksa (photograph - any size) ka den anogo 3 mesüra 4 jala e-mail : tiryimim@gmail.com nung yokang mesüra Tir Yimyim bureau tem nung agüjang.



- 1. Tenüng : _____
- 2. Tasoba anogo: _____
- 3. Küm : _____
- 4. Class : _____
- 5. School : _____
- 6. Talidak : _____
- 7. Salem osang : _____

NAIA YA METETER MA



Meimchir nükjangi Digital Camera yanglu asübo Megapixels 576 asütsü.

SUDOKU # 3560

8	1				
9	7		8	1	
	6	7	9	3	1
9	5	6	2		
6	4		1		8
			5	7	9
2	8				
6	9			3	8
5			4		2

TELANGZÜBA # 3561

4	3	5	8	9	7	6	2	1
8	1	6	4	2	5	9	7	3
2	7	9	6	3	1	5	8	4
1	5	2	9	4	3	7	6	8
9	8	3	5	7	6	1	4	2
6	4	7	2	1	8	3	5	9
3	6	8	1	5	4	2	9	7
7	9	4	3	6	2	8	1	5
8	2	1	7	9	9	4	3	6

OJANG LUTEP # 4065

- UTTEBEM :
- SÜRMEA :
- SÜTTETEM :
- AMONOGONG :
- NNUG :
- EMSPET :
- ALATILBOSA :
- SETTEMP Sü :
- NGBNUO :
- UNJGLA :

OJANG LUTEP TELANGZÜBA # 4064

NISUNG AIKATI MEKOKTETBA TIMTEM AJURUBA MAPANG NUNG ANG TSÜNGREM BILEMTETER

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Tanü na kümdanga melira senotsü samatsüa akok, anungji ajak tip-tema ayutsü merangang. Tanübo na kümkümshi alibajisa tajungba asütsü.



Taurus
20/4-20/5

Tanü nü dak teshisadangbaji balaka alitsü, aser nü dak temelenshi kar ajurutsü aser ibaji ajanga na ajangzüksü. Tangari na nükshia bilemtsü.




Gemini
21/5-20/6

Tanü nü tebilemba junga alitsü, aser tetsükdaksütemjia nai maongka ama agitsü. Ibaji ajanga nü taküm nung jenjang tasen ka yanglur asütsü. Tanü nai lenmang aika nung takok angutsü.



Cancer
21/6-22/7

Nü dang nungi temabapur den rarabangsen madoktsü merangang. Temaba jenjang nung alir dang nungi nai teyari nungdaksü, anungji nai kümdangtsüla.



Leo
23/7-22/8

Tanü ner kinünger dak sendakba sentong ka nung na adentsüa akok, aser na tangar den tesendaktep junga yanglutettsü. Tanü na kanga pelaa alitsü.



Virgo
23/8-22/9

Tanü nai tembar tasen ka yimtettsüa akok. Lokti kar nung na densemtsü aser nai nisung tasen kar ajurua parnok den metetpelateptsü.



Libra
23/9-22/10

Tanü lokti nung mangatettep kar adoktsüa akok, anungji iba nungjagi na jenbua alitsü merangang.



Scorpio
23/10-21/11

Tanü nai o kümdanga mejembira kar molung yirutsütsü. Ner kinünger dak sendakba benjung mesüra lokti sentong ka nung na densemtsüa akok.



Sagittarius
22/11-21/12

Kinünger aser medemertem den na jangratema amongtsü. Tanübo nai tebilemtsü ajak amadoker jangratema amongtsü merangang.



Capricorn
22/12-19/1

Olulu jembia angashiba nung nai tamang makatsüla. Tanü na kümkümshia aliba ajanga koda masüba tensa aika nungi jenbuttsü.



Aquarius
20/1-18/2

Tanü nai tensa tajung aser tamajung naprongla ajurutsüa akok, anungji na kanga kümdanga alitsü merangang. Talisa o kanga kümdanga jembitsü merangang.



Pisces
19/2-20/3

Tanü nungi tenzuka nü tebilemtsütem aika ajema akümstsü. Tang mapang nung na lenmang shitak nung jajadagi. Tanü anogo nai pela amongtsü merangang.

Bhojpuri Actress Anjali Shrivastava sür lia angu



Mumbai, June 20 (Agencies): Nüngtugu Bhojpuri actress aser model Anjali Shrivastava Andheri nung lar kidang sür lia ngutetba

Hombarnü police-i metetdaksü. Police ketdangsertemi ashiba agi, Anjali'er kinungertemi Allahabad nungi Deobar aonung nungi la den jembitsü asoshi meranga liasü, saka lai parnoki call asüba magizük.

Lar kinungertem shisabulua parnoki ki kibur den jembiaser ki kiburi police nem iba osang agüja Juhu lenmang nung aliba Parimal Society ki floor 5buba nung la takdang duplicate jabi ka agi Hombar nü lapoka ai. Parnoki takdang lapoka ai

dang, Arishi küm 29 tain actress ya tsüngbang fan nung sari ka sendaker aletsüta sür angu.

Police temi la takdang bushiogo, saka lai zülua doktsüba shidi kecha mangu mesera temolung malemtsüa kuli kecha mangu.

La temang autopsy atema R. N. Cooper Hospital-i bener ogo.

Lai Bhojpuri film aika nung shilem agiogo aser action-comedy film, "Kehu Ta Dilme Ba" nung lai tatembangsa shilem agia liasü.

Ed Sheeran-i dang masü Chainsmokers-i India semdangtsü

June 20, 2017 (Agencies): India nung taküm nüngtugu kentenertem kentenba sentong aika agia arudar. Ajaki sapuba 'Coldplay' pur kentenba sentong aser Justin Bieber kentenba sendong sülen ajaki yongyaa aliba kentener Ed Sheeran-i India nung kentenba sentong ka akatsü sangdongogo. Maneni 'Chainsmokers' 'Memories Tour' kentenba sentong nung Asia sema senzüba mapang India semdangtsü akok.

Ita aika tenati India semdangtsüba osang jembia arur tenati tenasasa Twitter ajanga India semdangtsüba sangdongogo. Tenati India semdangtsüba osang indang indangabo magütsü saka olen ka ajanga Asia sema senzüba mapang India aser Australia semdangtsüba shisem.

India nung tena kenten



sentong akatsüba anogo, mapang mesera tesema tang tashi nung metetdakja mali saka iba osang kichai India nunger fan tem kanga pelatepdar. Cold play den sentepa yangluba tena indang ken 'Something Just Like This' ajanga International music chart tem aika nung temaba jenjang

tongtetogo aser tena indang mezüngbuba kensep 'Memories... Do Not Open' nung aliba kentem fan temi kanga sapua angadar. 'The One', 'Young', 'Last Day Alive' aser 'Wake Up Alone' kentem ya kensep tasenba nungi nüngtugu ken kar lir.

Jay Z-i kensep tasen '4:44' June 30, 2017 nü sayatsü

June 20, 2017: Kentener Jay Z aser pa kinüngtsü, Beyonce na nem jakrep maotsüba sülen June 19, 2017 nü pai, pa indang kensep tasenba '4:44', June 30, 2017 nü music streaming service TIDAL züngsemtem atema sayatsü, ta metetdaksü.

Kensep '4:44' ya Jay indang solo studio kensep 13buba

asütsü. taoba mapangtem nung pai collaborative records asem, live LP ka, compilation albums pongu, soundtrack kensep ka aser EPs ana adoka liasü.

1998 küm nungi tenzuka pa indangnija kensep shiai US album chart nung jenjang tajung ngua arudar. UK nungbo pai takok junga mengutetaka 2013 küm

'Magna Carta... Holy Grail' ajanga UK number 1 LP jenjang angu.

Pa indang kensep tasenba ya TIDAL atema dang ta sangdongba nungji kecha süngangtsü mali, kechiyong iba music streaming sabang ajungkettsür rongnung pa ka lir.




Mumbai, June 20, 2017 : Mumbai nung 18buba International Indian Film Academy (IIFA) Awards atema osangbenertem senden nung Bollywood actor Varun Dhavan aser Saif Ali Khan na den film yanglur, Karan Johar nungeri shilem agiba noksa nung angur.

TAN HOPTA ATEMA - KOMA SÜLA ?

Q. Nagaland government nung ochimashi inyakba mapatem ajunga ya CBI nem bushisüngdaksütsü asoshi temelaba agütsü nunga koma süla ?

Olong 20 shi nung June 23, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzubatemi taruba Deobarnü adoktsütsü.

Autodesk-i Andrew Anagnost tir tasenba aser CEO asütsü asoshi shimogo



Andrew Anagnost (File)

June 20, 2017 (Agencies): Global software firm Autodesk-i Mongolbarnü Andrew Anagnost company tir aser CEO asütsü asoshi shimogo. Pa Autodesk board of directors nunga shilem agitsü.

Autodesk Inventor, company 3D model-based product design

as er engineering tool tem nung engineering mapatem Anagnost lenisüba kübok inyaker.

"Autodesk atema tang ya kanga dang jangratemtsü mapang ka lir aser ni CEO ka ama inyaksü asoshi kanga pelar," ta Anagnost-i ashi.

February ita company

indang taoba tir Carl Bass mapa nungi anenba sülen Anagnost iba mapa asoshi shimok.

Anagnost 1997 küm Autodesk nung aden aser company nung tongtibang shilem aika agia aruogo.

"Board nung züngsemtem aser ni Andrew-i Autodesk jenjang tajungba kadangi anir aotsü ta bilema kanga pelar," ta, Autodesk, Board Chairman, Crawford W. Beveridge-i ashi.

Autodesk-i maneni Senior Vice President, Chief Product Officer aser interim co-CEO Amar Hanspal company toktsüba osang sangdongogo.

"Company nung küm 30 tashi inyaka arudang Amar-i tongtibang shilem aika agiogo aser iba atema pa dang kanga pelar," ta Anagnost-i ashi.

Sen 5,777 jenjang Intex Aqua S3 India nung sayaogo

New Delhi, June 20 (Agencies): Intex ajanga kanga kara charge asüba aser 4G VoLTE amshitetba Aqua S3 smartphone India nung tanü sayaogo. Intex Aqua S3 tasenba ya Champagne sentsü nung sen 5,777 agi angutsü. Iba company ajanga anogo ishika tejaklen Intex ELYT e7 phone saya liasü aser iba phone ya Amazone India store nung angur.

Iba phone tasenba, Intex Aqua S3 indang battery tashi ya 2450mAh lir. Iba phone indang display ya 5-inch HD lir aser processor ya 1.3GHz quad-core

lir. Phone indang RAM ya 2GB aser ROM ya 8GB lir aser microSD ajanga 64GB tashi inoka amshitettsü, ta company ajanga metetdaksü.

Intex Aqua S3 indang operating system ya Android 7.0 Nougat lir. Iba smartphone tuozük ya gram 165 lir. Iba phone indang display nung apps aika khen nung sayuteter, ta company ajanga ashi.

Intex indang Aqua S3 indang tesülen camera ya 8-megapixel aser tejaklen camera ya 5-megapixel lir. Iba phone nung feature tajung ka ji, QR Code scanner lir aser iba

kisung masü phone samar aliba bushitettsü asoshi miFon security inoka lir, ta company ajanga ashi.

June ita tetenzüklen Intex ajanga 4G VoLTE amshitetba Intex ELYT e7 smartphone saya liasü. Iba phone indang display ya 5.2-inch HD IPS den 2.5D curved glass protection keta lir. Intex ELYT e7 indang processor ya 1.25GHz den 64-bit Quad Core Mediatek lir. Iba phone indang RAM ya 3GB aser internal storage ya 32GB lir aser microSD ajanga 128GB tashi inoka amshitetter.

Teen Choice Awards atema Deepika züngsemogo

June 20, 2017 (Agencies): Bollywood nung nungtugu actress Deepika Padukone xXx: Return of Xander Cage nung shilem atema 'Teen Choice Awards' nung züngsemogo aser la Wonder Woman Gal Gadot den iba award atema tokteptsü.

DJ Caruso- i directe asüba film xXx: Return of Xander Cage nung arishi küm 31 tain Deepika xXx agent Serena

Unger ama shilem agi, kong lai alima kümzükba maparen nung Xander Cage yaria liasü. Iba shilem tajung asoshi la 'Choice Action Movie Actress' jenjang nung züngsema lir.

Iba film nung la den külemi shilem agir Nina Dobrev aser Ruby Rose nata iba award atema züngsema lir.

Iba jenjang nung Fate of the Furious actress Michelle Rodriguez aser Pirates of the


Caribbean: Dead Men Tell No Tales nung actress Kaya Scodelario na dena züngsema lir. Deepika co-star aser film nung tongti shilem agisang Vin Diesel Choice Action Movie Actor jenjang nung züngsema lir.

DJ Caruso-i tawa Deepika maneni "XxX: Return of Xander Cage tatongtep film nung shilem agitsü, ta sangdongogo.



Northwest China, Shaanxi Province yimtiba Xi'an nung drone ka khu bener goods delivery landing site-i aruba mapang tangokba noksa nung angur. 2017 June 18 nungi tenzuka Chinese e-commerce trader JD.com-i Xi'an nung drone service agütsür.

NASA-i alima tasen 10 ngutet



Washington, June 20 (Agencies): NASA-i Mongolbarnü alima tasazük den tasazük kasashi aliba planet tasen 10 sayaogo. Parnoki ashiba agi item planet tem nung tzü alitsü südi kong taküm aliba shiruru aser süngdong litongtem litettsü.

Kepler mission team ajanga asenok aliba solar system adena or aliba potential exoplanets 219 sayaogo. Milky Way galaxy scan asütsü atema 2009 küm space observatory ka amenoka aliba ajanga item planet tem ngutet.

Planet tasen ngutetba rongnungi 10 bo parnok anü meketa asen aliba limai anü meketba tasazük kasa nung orbit südar. Iba dang ya 'habitable zone' ta ajar aser item planet tem nung tzü alitsü imlar kong taküm aliba shiruru aser süngdong litongtem litettsü.

Kepler-i tang tashi nung potential exoplanet 4,034 nguteta lir aser item rongnungi 2,335 bo tanga telescope temia shidakba planet ta jangjatsüogo.

Asen lima tasazük mesükba planet tasen 10 tang ngutetba ajanga 'galaxy' nung 'habitable zones' nung aliba planet parnoki ngutetba ajak agi 50 jungogo.

Iba tengutetba ya California, NASA Ames research center nung 4buba Kepler aser K2 science conference iba hopta amongdang saya liasü.

Kepler telescope-i planet tasentem ya telescope süiba mapang nung petinu ka tesangwa nung 'minuscule drops' asadanga ajanga meteter aser iba movement dang ya transit ta ajar.

NASA-i ashiba agi, exoplanet tem bushisüngdanga nung tanga tashi nung tawa ngutetba ya tabensaba lir. Iba telescop ajanga Cygnus constellation nung petinu 150,000 bushia asadanga. NASA-isa ashiba agi joko iba bushisüngdang ya tembangogo.

Iba mission ya 2013 küm technical tsütsü tibelemtsü adoka liasü saka telescope ajanga K2 project kübok alima tasentem maneni dang bushia liasü.

India nung sen 47,990 jenjang Samsung Galaxy Tab S3 sayaogo



Bengaluru, June 20 : Mobile Business, Samsung India Director, Vishal Kaul-i Samsung Galaxy Tab S3 Bengaluru nung sayadang tangokba yangi angur.

Bengaluru, June 20 (Agencies): Tanü Bengaluru nung sentong ka nung Samsung ajanga Galaxy Tab S3 sayaogo. Iba tablet ya Mobile World Congress 2017 (MWC), Barcelona nung mezüng sayua liasü aser iba Tab nung S-Pen Stylus densema lir.

Galaxy Tab S3 indang display ya Super AMOLED 9.7-inch lir aser Quad-Core Qualcomm Snapdragon 820 procesor lir.

Iba Tab S3 indang RAM ya 4GB aser internal storage ya 32GB lir aser 256GB tashi inoka amshitettsü. Iba Tab indang tesülen camera ya 13-megapixel den Auto Focus lir aser tejaklen aliba camera ya 5-megapixel lir. Galaxy Tab S3 nung USB 3.1 Type-C amshitetter aser Android 7.0 Nougat lir. Iba Tab indang battery tashi ya 6,000mAh lir aser Fast-charging asütsü akoker.

Iba Galaxy Tab S3 nung Accelerometer, RGB Sensor, Fingerprint Sensor, Gyro Sensor aser Geometric Sensor keta lir. Iba Tab nung Samsung Smart Switch, Samsung Notes, Air Command, Samsung Flow aser AKG-tuned quad-speaker system keta lir.

Samsung Galaxy Tab S3 ya sen 47,990 jenjang yong saya aser Black aser Silver sentsü nung angutsü.

Iba Tab den S-Pen Stylus ka densema angur. Iba tab alir temi Reliance Jio amshira sen 309 agi recharge asüba ajanga ita shia 28GB + 2GB agütsütsü.

Iba Galaxy Tab S3 atema Book cover ka sen 2,999 agi angur aser iba den Keyboard cover ka sen 8,499 agi angutsü.

Iba Tab ya July 31 madongdang alira khen atema Samsung ajanga iba Tab S3 idang screen ya sen 990 agi melentsütsü maongka angutsü.

Ram Nath Kovind-i Angh menden toktsüogo: Yimtenren telok kari pusemer, kari ashishiteper

Patna/New Delhi, June 20 (Agencies): NDA presidential candidate shimba sülen Ram Nath Kovind-i Mongulbarnü Bihar Angh indang mapa nungi anenogo.

Tir Pranab Mukherjee-i tanü Kovind mapa nungi anenba shidi agizük.

West Bengal Angh Keshari Nath Tripathi nem Bihar Angh repsema inyaka atatsü atema mapa lemzüksüogo.

Hombarnü Kovind-i Prime Minister Narendra Modi aser BJP tir Amit Shah na den ajurutep aser NDA nung madenba teloktem- BJD, TRS aser YSRCP temia Dalit lennir Kovind yaritsü ta metetdaksüogo.

Kovind-i June 23, 2017 nü Tir election nung tokteptsü atema pa tenüing agütsüta akok.

Mongulbarnü, Bharatiya Janata Party (BJP) lennir Subramanian Swamy-i ashiba agi, Tir inyaksü atema Ram Nath Kovind dang nungi nübo tajungba mali.

Kovind ka aika ajangshia aruba aser tashitemet lennir ka lir. Pa Dalit nung asüba agidang tir candidate shimba masü, ta Swamy-i ashi.

"Pa dang nungi nübo tajungba mali. Pai Linük Temzüng kanga junga meteta lir. Pa Dalit nung asübayong shimba dang masü,



June 20, 2017 nü NDA indang presidential candidate Ram Nath Kovind-i New Delhi nung aliba Bihar Niwas nungi kimai aludang agiba noksa ka angur.

pai aika ajangshia aruogo aser aika meteta lir" ta paisa metetdaksü.

Yashi BJP parliamentary board senden ka amenba sülen BJP tir Amit Shah-i tir election atema NDA-i Kovind shimba osang metetdaksü.

Iba osang sangoktsüba sülen Prime Minister Modi-i Congress tir Sonia Gandhi aser taoba prime minister Dr. Manmohan Singh na den jembia aser Congress-ia Kovind yaritsü atema ayongzüka liasü.

Modi-isa Bihar Chief Minister

Nitish Kumar, Andhra Pradesh Chief Minister Chandrababu Naidu aser Tamil Nadu Chief Minister E Palaniswamy nungertem den jembia.

Kovind-i Tir mapa kanga junga inyaksü aser pai sensakertem, tangar memenepertem aser teküpbok jenjang nung alirtem ajungkettsü atema maneni inyaksü, ta Modi-i ashi.

Ajisüaka, BJP-i Kovind shimba atema yimtenren telok kari mepelaba metetdaksüogo. Congress nung lennir kari ashiba

agi, BJP-i parnok dang kecha meshishii telemetba agi aser külen BJP den yariteper Shev Sena-i iba ya vote angutsü atema inyakba mapa ka lir ta ashir.

Centre-i parnok vote bank ajungtsü atema Dalit nung ka Tir election atema shimba süra, Shiv Sena-i teyari magütsüta ta metetdaksü.

"Nisung kari vote angutsü nükjidong nung Dalit nung ka shimtsü meranger süra, onoki meyariteptsü" ta Shiv Sena tanishir Uddhav Thackeray-i ashi.

Trinamool Congress (TMC) tir aser West Bengal Chief Minister Mamata Banerjee-ia Kovind shimba atema mepelar ama metetdaksüogo.

Tir Pranab Mukherjee mesüra External Affairs Minister Sushma Swaraj mesüra BJP lennir tejen LK Advani nung amala jenjang nung alir ka shimtsüla, ta Mamata-i ashi.

Bihar chief minister Nitish Kumar-i Bihar angh Tir inyaksü shimba atema pelaba metetdaksü. Ajisüaka, iba dak sendakba onük ya JD (U) sasep nung kanga junga jembitsü, ta paisa shisem.

Kovind ya Koli ta ser Dalit nung telok ka nungi lir. Pai Uttar Pradesh aser Bihar nung mapa jenti inyakogo aser BJP atema shisalen sayur Rashtriya Swayamsevak Sangh (RSS)-ia pa pusema nungiter.

Kovind ya lawyer ka lir aser pai BJP Scheduled Caste Morcha tir (1998-2002) aser All-India Koli Samaj tir mapatem inyakogo. Tir Pranab Mukherjee indang kümsük tembanga July 24, 2017 nü pai Tir menden toktsüta aser iba atema July 17 nü India Tir election agitsü.

Election Commission of India (ECI)-i iba dak sendakba nung osang sangdongogo aser June 28, 2017 tashi tenüing agütsüba maparen inyaksü.

PM Modi-i APJ Abdul Kalam Technical University lapoktsü Tanü Lucknow nung International Yoga day nung adentsü



June 20, 2017 nü Lucknow nung Prime Minister, Narendra Modi -i Pradhan Mantri Awas Yojana (Rural) indang Sanction Letters agütsüdag agiba noksa angur. Noksa nungsa Uttar Pradesh Chief Minister, Yogi Adityanath aser Deputy Chief Minister Keshav Prasad Maurya na angur.

Lucknow, June 20 (Agencies): Mongulbar anüingdag Prime Minister Narendra Modi-i Lucknow tonga aruba sülen Dr APJ Abdul Kalam Technical University lapoktsü.

"Defense aser security nung asenoki shinga teyari magii otettsü mangdag nung asenok tejakleni aoer" ta tanü Modi-i ashi.

India-i satellite 104 apusoa yokdag alimai asenok meteta aküim. Asenok dak tashi lir aser tejaleni otettsü, ta paisa shisem.

Tanü Modi-i Uttar Pradesh yimtiba tonga arudang UP CM Yogi Adityanath aser minister temi tayimtsü anendak pa pela agizük.

Pa tonga aruba sülen Prime

Minister-i Central Drug Research Institute (CDRI) indang campus tasen lapoktsü.

Iba sülen pai, Dr APJ Abdul Kalam Technical University indang ki tasen lapoktsü.

Iba sentong nung Modi-i Pradhan Mantri Awas Yojna kübok nisung 20 nem 'allotment letters' agütsü. Paisa Lucknow aser Kanpur tsüingda 400 KV transmission line lapoktsü.

Bodbarnü Prime Minister Modi-i Ramabai Ambedkar Ground nung nisung 60,000 den International Yoga Day amungtsü.

Asüngnep 6:20 ako meta nungi minute 80 yoga session tenzüksü aser iba nung yimten yimsüsürtem, ketdangsertem aser mongin nisungtem aikati

shilem agitsü.

Prime Minister-i anogo ananü Lucknow semdangba atema security kanga akangshio. Police den Provincial Armed Constabulary (PAC) company 25 tashi mapa lemzükja lir.

Yimti nung CCTV camera 400 shi enokogo aser tesem balala nung drone camera tem amshir.

Asüngnep agitsüba sentong nung Prime Minister Modi, Angh Ram Naik, Chief Minister Yogi Adityanath aser Deputy Chief Minister Keshav Prasad Maurya nungertemi yoga aitsü.

Ramabai Ambedkar ground nung LED TV tem enokogo aser iba yoga session ya live sayutsü.

Tejashwi Yadav-i IT department aitsür

Patna, June 20 (Agencies): Income Tax ketdangsertemi RJD tir Lalu Yadav'er kinungertem kiojenten mita aoba sülen Lalu'er jabaso aser Bihar Deputy Chief Minister Tejashwi Yadav-i iba mapa ya yimtenren nung ajemdaker inyakba lir ta aitsüogo.

"Iba ya yimtenren onük nung ajemdaker inyakba mapa ka lir. Kuli kecha melii ozü dak tai tongloksür. Onoki kecha miimbanga mayur aser asüngdangya süra, onoki langzüksü renema lir" ta Tejashwi Yadav-i ashi.

Mongulbarnü Income Tax

department-i Deputy CM Tejashwi Yadav, Lalu Prasad Yadav kinungtsü Rabri Devi aser jala Misa Bharti nungertem Benami Transactions Act kübok ken o benok.

Income Tax department-i Misa Bharti aser la kinungbo Shailesh Kumar, Tejashwi Yadav, Rabri Devi, aser Ragini o Chanda Yadav nungertem indang kimung 12 sota lir. Parnokisa Lalu Prasad'er kibong anema attachment notice ka agütsüogo aser iba sen crore 9 indang rongsentem lir.

West Bengal nung nisung 9 asü

Kolkata, June 20 (Agencies): West Bengal kübok tzünglu aser tsüingda ajanga nisung 9 tashi taküm samaogo.

Yashi nikongdag nungi lendong balala nung nisungtem asü aser tasür 9 rongnung 8 ji tsüingda agi aiset aser ka awatsüing ka nung arakset, ta ketdangsertemi metetdaksü.

Tasürtemji Hooghly nung pungu, East Burdwan nung ana aser North 24 Parganas nungi ka liasü. Ano, Bankura nung nisung ka awatsüing nung arakset, ta

state disaster management department ketdangser kati ashi.

Bihar, Jharkhand aser West Bengal nung tsüingdag-mopung majungba ajanga Bankura, East & West Burdwan, East & West Midnapore, South & North 24 Parganas aser Murshidabad district tem nung tzünglu kanga arur, ta Met director G K Das-ia ashi.

Asüng tashi item district tem nung tzünglu arutsü. Taruba anogo tashi Bengal anüdoklentip tsütsü tzünglu tulu arutsü, ta paisa shisem.

Taslina Nasreen visa atsülangtsüogo

New Delhi, June 20 (Agencies): Bangladesh nung ashishitep aketba kakat zülur Taslima Nasreen indang visa küm ka atema atsülangtsüogo.

Union Home Ministry-i July 23, 2017 nungi la indang visa mapang apuloktsü.

Tanü Home Minister Rajnath Singh-i la indang visa mapang apuloktsütsü mulunga agizük, ta ketdangsertemi ashi.

Taslina ya Sweden senso ka lir aser la nem 2004 nungi Indian visa agüja India nung lidakja arur.

1994 küm Bangladesh nung teloktemi la taküm agitsü amokmerenba ajanga Taslima-i lar linük toktsür jena aru.

Tesüiba küm 20 tashi lai US aser Europe nung liyonga aruogo. Ajisüaka, lai aiben India nung aser talisa Kolkata nung teti atema alitsü janrang ta tebilemba metetdaksüogo.

Taslina-isa India nung permanent residency atema asüngdangogo saka iba atema Home Ministry-i telemetba kecha magi lir, ta osang ka ajanga ashi.



Tokyo, June 20: Japan yimtiba Tokyo nung Japan Ato Kelonser aliba kidang Guinea tir, Alpha Conde (abelen) aser Japan Ato Kelonser, Shinzo Abe külemi 2017, June 20 nü osangbener den jembiba mapang tangokba noksa nung angur.

Syria refugee, Muzoon Almellean UNICEF Goodwill Ambassador shim



Muzoon Almellean

United Nations, June 20 (Agencies): United Nation Children's Fund (UNICEF) ajanga Syria nunger refugee, Muzoon Almellean ya Goodwill Ambassador shimogo. Aser la ya United Nation (UN) indang Goodwill Ambassador rongnung tasenba aser tanutsütila lir.

June 20 nung World Refugee Day amongba mapang arishi kum 19 tain aser education activist, Muzoon ya alima nung mezüngbuba refugee rongnungi UNICEF indang Ambassador shimer, ta osang ka ajanga ashi.

Muzoon ya Jordan nung aliba Za'atari refugee camp nung alidang nungi UNICEF-i yaria liasü aser lai asür Audrey Hepburn tsüngsü nung jaja liasü. Hepburn ya Goodwill Ambassador ka liasü aser la ya UNICEF ajanga yaria liasü.

"Ni tanur ka süaka education ya kü indang tarutsü nükla, ta ni meteta lir. Anungji kodang ni Syria doktsür ajen, ni kü indang school kaket dang bener ao," ta Muzoon-i ashi.

"Refugee ka asünung tanurtem dak kechi adaloker, ni angur. Tanurtem tashiyim agi kibong kümdaktsür aser mapa inyakdaktsür - parnok atema education samaogo aser parnok tarutsü nükla samaogo," ta lai ashi.

World Refugee Day ya kum shia June 20 nung amonger aser alima ajunga nung aliba nüburtemi iba anogo nung refugee million aika indang tashi, tasü tait aser parnok nükla tajungtem bilemteta amonger. Tesem balala nung raraba aser azüdokshiba ajanga kibongtem pei aliba tesem doktsür jena aoba nisungtem bilemteta taküma kasa anogo nung nüburtemi alima ajunga

nung mongogo.

Syria nung rara adokba ajanga Muzoon ya lar kibong den 2013 nung jena ao aser Jordan nung refugee ka ama kum asem tashi ali aser iba sülen Britain nung oa ali. Za'atari camp nung Muzoon ita 18 aliba mapang lai tanurtem aser talisa tetsür nem education agütsütsü osang prokshia liasü.

Muzoon ya tawa UNICEF den külemi Chad-i ao, iba linük nung rara adokba ajanga tanurtem aika kaket shisatsü monguteti kumogo aser item rongnung tetsürtem shilem asemsü agi tebur dang timba kaket shisatsü monguteter, ta UNICEF ajanga sangdong.

Muzoon iba linük nungi meyiba aruba sülen raraba tesem nung aliba tanurtemi kaket shisatsü bushiba aser angazükba mapang timtem ajuruba khurettem asoshi mapa inyaker.

Iba ama raraba tesem balala nung aliba tanur million 25-shi kaket reju doktsüogo aser iba amala tesemtem nung kaket shisatsü agütsütsü asoshi senotsü peria monguteter. 2010 kum nungi tenzüka nüburtem nem teyari balala agütsüba nung shilem ana dang tajemba dang kaket shisatsü bushiba nung indoker. Item tanurtem nem kaket shisatsü agütsütsü asoshi kum shia sen billion \$8.5 nungdaker, ta UNICEF-i ashir.



Barbiana, June 20: Barbiana, Italy nung 20th Century mapang Italy nunger nungtugu putir, don Lorenzo Milani indang tasü mang aremdak leper, Pope Francis-i 2017, June 20 nü semdanga nüburtem den jembiba mapang tangokba noksa nung angur.

Colombia nung Dutch nunger osangbener ana tashiyim agi pua bener ao

Colombia, June 20 (Agencies): North-eastern Colombia nungi Dutch nunger osangbener ana Marxist ELN teloki tashiyim agi pua bener ao, ta mitkar osang ajanga ashi.

Iba maparen ya Marxist telungpurtemi inyak ta mashi aser meinyak ta mashi saka parnoki Twitter ajanga iba ken o bushisüngdang südagi, ta Hombarnü sangdong.

"Tanep osangbener arishi kum 62 tain, Derk Johannes Bolt aser arishi kum 58 tain cameraman, Eugenio Ernest Marie Follender, tenabrong Dutch nunger lir, aser tena ya El Tarra, Norte de Santander nung ELN telungpur temi anendaktsü," ta police ajanga ashi.

Dutch TV sentong, Spoorloos ajanga samar aliba kinungertem bushir aser iba TV sentong nung Bolt aser Follender-na mapa inyaker.

2016 kum May ita nunga kasa El Tarra region nung ELN telungpur temi Colombia-Spain osangbener ka aser Colombia TV reporter ana tashiyim agi apu. Item osangbener tem ya anogo ka sülen, tetsüngtai ia yimjung yanglur nem agütsü.

Dutch nunger osangbener

ana ya tekeraba nung chiyoktsüla, ta sorkar ketdangser kati Twitter nung zülutsü.

Iba osangbener ana ya kumzüksü nükjitong nung tashiyim agi nisung pua bener aoba aser tashiyim agi rongsen meshiba maparen repringer police mongintem iba tesemi ogo.

ELN telok ya Colombia nung aliba telungpur telok tulutiba rongnung tanabuba jenjang nung lir aser item telok ya yimjung nung alitsü asoshi sorkar den yimjung ken o jembiba mapang lir.

Colombia nung telungpur telok toluba, Revolutionary Armed Force of Colombia (FARC) aser sorkar tsüngta yimjung nung alitsü tezüngzüktep ka taoba kum tatemlen zülutepa lir aser iba tezüngzüktep nung ajemdaker FARC ajanga raradang amshiba oset ajunga tain hopta nung doktsütsü imlar.

Colombia nung 1952 kum nungi tenzüka sorkar, FARC, ELN aser right wing paramilitary army rem tsüngta raraba mapang nisung 220,000 dak tali takum samaogo.

Mogadishu nung bomb apok, nisung 15 asü



Mogadishu, June 20 : Somalia yimtiba, Mogadishu nung 2017, June 20 nü gari nung bomb pokdaktsüba ajanga sorkar meyong ki raksar aliba noksa nung angur.

Mogadishu, June 20 (Agencies): Somalia yimtiba, Mogadishu indang district headquarter nung nüburtem nem mamatzü belentsüba gari ama yanglur iba gari nung bomb inoker pokdaktsüba lendong nung nisung tajemba agi 15 pokset, ta police temi ashi.

Mogadishu nung aliba district headquarter, Wadajir nung iba lendong ajanga nisung asürtem ya timba akümtsü südi, kechiyong iba kasa lendong nung yirur aliba nisung 9 temang kanga mejungi lir, ta Captain Mohamed Hussein-i osangbener dang ashi.

Iba lendong nung asürtem ya timba civilian lir, ta Hussein-isa shisem.

Iba tesem nung bomb apokba ajanga yimti anünglak tashi mokozü temesüng atuba angu aser ki aika anokshitsü, ta osang ka ajanga ashi.

Iba lendong agütsüba ya Al-Shabab teloki tenüng agiogo. "Ibai suicide car bomb ka

liasü aser iba Wadajir district nung Somalia ketdangser aser staff aliba ki anasa pokdaktsü. Iba lendong nung sorkar ketdangser aser staff tem asü. Iba lendong nung asür nisung tejangja khen lir ashitsü," ta Al-Shabab indang odongtar, Abdiasis Abu Musab-i ashi.

Al-Shabab züngsem kar-i Mogadishu tesem nung aliba nungtugu restaurant ka aonung amakba mapang nisung 31 tepset, aser iba lendong adaloker hopta ka majungdang kasa tesem nung tanü iba lendong adalok.

Al-Shabab telok ya Somalia linük yimtiba nungi Somalia mitkar aser African Union multinational forces temi aridok, saka item telok ajanga Mogadishu aser tesem balala nung lendong tesashi maneni agütsür.

Iba telok ajanga hotel, police checkpoint aser tir aliba ki amala nung lendong agütsütsü meranger.

Union Minister...

(Tapak 1 nungi..)

"Enhancing Skill Development Infrastructure in NE States & Sikkim" scheme ya February 2010 nung sen crore 57.39 lemozukja tentetba lir.

Iba mapang, ITI lapoka aliba 20 up-gradation asutsu aser 28 Supplementing Deficient Infrastructure atema shima liasü.

2014 nung "Establishment of 14 new ITIs" ta ser mapatong tasen ka tenzük aser iba nung ITI shia sen crore 6.22 agütsütsü lemtet. Maneni 2015 nunga ITI tasen 22 lapoktsü lemtet aser ITI shia nem sen crore 9.50 lemozüksü.

Nagaland nung ITI...

(Tapak 1 nungi..)

Iba sentong ya MSDE-i Ministry of Ayush den yaritepa linük ajungalen ayongzük.

ITI anaji Kiphire aser Longleng district tem nung lapoktsü aser Nagaland nung ITI teimbaka nung teburtem hostel lapoka lir aser ministry-i tetsürtem indang hostel lapoktsü bilemer, ta Rudy-isa osangbener dang ashi.

State sorkari ITI tem indang infrastructure melentsü atema asüngdangogo aser ibaji ministry-i asadangdar, ta paisa shisem.

BJP-i aniba NDA sorkari North East tesem renlokdaktsütsü atema tongti süa mapa inyaker, ta Rudy-isa metetdaktsü.

Linük nung nashishi nokdangba ajanga Nagaland state nung ola adokba atema osangbenertemi asüngdang Rudy-i "nisung ka achiajemba azüoktsü makok, asenoki nisung ka indang tamangba yimsü aser inyaksangshi akhümtsübutüsüla saka linük temzüng anema menokdaktsüla" ta langzü.

Mokokchung-Mariani National Highway... (TAPAK 1 NUNGI...)

Senden nungsa sorkar contractor tem dang nungi royalty memeshitsü atema ali kibur yimtsüng 14-i lemtet. Gari lenmang jungjunga yanglutsü mechi nung aser senso ajak ajangzüksü atema ali kiburtemi royalty magitsü lemtet.

Maneni, tanga teloktem aser talisa telungpur teloktemi ali kiburtem ama contractor tem dang nungi saru kecha mesarutsü metetdaktsür, ta

parnokisa metetdaktsü.

Ano, All Ward Union Mokokchung Town (AWUM)-ia tanga sangdong ka nung Mokokchung, Tuensang aser Zuneboto atema tongti lenmang Mokokchung Mariani National High way 702 -D yanglutsü ta angazükogo aser iba nung AWUM-i akokba lenmang ajak agi yariteptsü, ta metetdaktsü.

AWUM-i iba mapa nung contractor den yariteptsü aser

contractor-ia lateta aliba ama mapa jungjunga inyaksüla ta sangdong nungsa shia lir.

Maneni ali kiburtem, linük tenzükertem aser kijatemi iba mapa nung yariteptsü aser telok mesüra kija, shingaia iba mapatong nung tetsükdaktsü mesüra timtem magütsütsü mepishia metetdaktsür, ta AWUM tir R. Ayim Longkumer aser tongti tezülur Lanumeren nati sangdong nung metetdaktsü.

SANGDONGER

19 June 2017 nung kinüngertemi lemtetba ama, Mr Longkokmeren Kichu S/o Sensashiba Kichu Aliba, pa nem shibaisa sen apuja ali aser aputsüdir pa kija khuret asütsü, ibaji kinüngertemi memetet, aser iba dak sendakba nung ozü kimong lumong aotsü makok ta sangdonger.

Kinünger tenüng nung

1. Mr. Chubatoshi Kichu
2. Mr. Chubakümzük Kichu, Aliba

OFFICE OF THE VILLAGE COUNCIL MOPUNGCHUKET P.O. IMPUR**SANGDONGER**

Mopungchuket lushi aser ayongtem nung shingaia taküm shiruru samatsüsa prangpong, mim mozü, shinü aser battery amshia shiershitsu mesüra yataentatsü bendanga memelar. Shibai iba ozüng anema inyakdir, senchi senpak 1,00,000/- (Rupees One Lakh) achitsü ta yimden ajanga sangdonger.

Sd/-**Chairman, Village Council Mopungchuket****ONE DAY OPEN PENALTY SHOOTOUT TOURNAMENT**

Organised By : Medical Ward Youth Union, Changtongya Town, Nagaland.

Date : 4th July 2017 Time : 8:30 A.M

Venue : Public Ground, Changtongya Town.

1st Prize : ` . 15,000 /-

2nd Prize : ` . 8,000 /-

* Registration Fee: ` . 1000 /- only.

* Forms will be available & can be submitted on or before 3rd July 2017 at Oasis Shop Changtongya Town (8730804623) / Food City Changtongya Town (8974691371) / Dokan Dokan opposite M.T.B.A Church Mokokchung Town (9862903429) / Mar Pan Shop Longpong Ward, Tuli (8259095144) / or to the organizer.

**For further details contact :
7005271306 / 9774934062**

Happy 75th Birthday

**Mr. R. Imkong Jamir
21.06.1942**

Dear Papa,
As you celebrate your 75th birthday,
We hope that you are surrounded by love,
And the joy that you have given over the years is returned to you.
May your birthday and each day that follows
Be filled with happy moments.
Happy Birthday!!

Loving wife, children, in-laws and grandchildren

Office of the

Lemtor Kidong

Chuchuyimpang : Mokokchung

TENUNGSANG AGUTSUR

Wb. Lanuienba Lemtor'er jabaso Dr. Maongtoshi Lemtor-i Economics nung "Agricultural Production and Productivity in Nagaland : A case study of Mokokchung and Zunheboto District" thesis nung Nagaland Univeristy nungi tesayur Mithilesh Kumar Sinha leniba nung Doctorate in Philosophy (Ph.D) jenjang ngutetba takok ajanga Lemtor kidong, Chuchuyimpang aküm tulu nguogo aser pa nem tenüngsang tulu agütsür.

Tulusang Tsüngremi tarutsü nunga maneni nü taküm takok tulu nung aniangma

Sd/-**Mr. Yarshilu
President****Sd/-****Mr. Alemsujung
Secretary**

Office of the

Medemchanger Putu Menden

(Village Council Chungtia)

Mokokchung-798601, Nagaland

SANGDONGER

2nd June 2017 Mr. Lolenwati Chuchuyimpang-i Lt. T. Moarenla Imchen Chungtia tepsetba atema sobaliba nung ajemdaker Chungtia Medemchanger Putu Menden-i par dang Dt. 16th June 2017 nü tapet temerenshi agütsüogo.

Chairman Chungtia Village Council

2nd June 2017 Lt. T. Moarenla Imchen Chungtia Mr. Lolenwati Chuchuyimpangi tepsetba sendakba nung Council ana (Chungtia Council & Chuchuyimpang Council) telongjem nung yamai renema ayur. Shinga/kecha telokia Mr. Lolenwati jail nungi agizüksü Council anati memelar. Shimoki/shibai agizükdir pei khuret asütsü ta tanü Dt. 16th June 2017 nung renema ayur.

**I. Zulu Imsong
Chairman**

Chuchuyimpang Village Council

**M. Akok Kichu
Chairman**

Chungtia Village Council

Office of the

Watsü Mungdang

Head Quarters: Mokokchung, Nagaland

SANGDONGER

Destitute Women Pension April 2016 - March 2017 Women Resource Development nungi aruba Watsü Mungdang ajanga 21 - 24 June 2017 tashi nung agütsütsü. Anungji beneficiaries tem ajak payment book bener 10:00 Am - 3:00 Pm tashi nung Watsü Office-i arua agitsü metetdaktsür. Koda masü marutetsüsa kümra pei yimtsüng/ward pastor nungi khuli tejangja den payment book bener yoktsü metetdaktsür.

Sd/-**Prof. Kilangla, Co-Ordinator
Micro-finance Committee****Sd/-****Wt. Maongienla, President
Watsü Mungdang****METONGSHITSUR**

Ao Milen adok 590 page 6,20.06.17 issue aser Tir Yimyim adok 242 Page 2, 20.06.17 issue Ungma Senso Telongjem "TENUNGSANG AKATSÜR" Sl.no.1 nung Wb. Imtiyapang Pongen S/o. Rev.Nungshi ta alibaji Wb. IMTIYAPANG IMSONG S/o. Rev.Nungshi ta metongshia azüngtsü metetdaktsür, aibelenba asoshi sasaar.



Mongulbarnü Mirik nung Gorkha Janmukti Morcha (GJM) züngsemtem aser parnok pusemertemi Gorkhaland tentetsü takhangba agüja lungkak aitdang agiba noksa ka angur. (Mirik/Darjeeling, June 20)

Australian Open: Kashyap, Siril, Ruthvika nunger Qualify süogo



Sydney, June 20 (Agencies): Commonwealth Games champion P Kashyap Australian Super Series badminton asayamong main draw nung Korea nunger World No. 1 Son Wan Ho den asayatsüba lir.

Kashyap yiruba ajanga mapang talangka junga masayateti arur iba asayamong mezüngbuba round nung China nunger Zhao Junpeng 21-15 21-18 agi akok aser iba sülen tanabuba round nung pai Japan nunger Indonesia Super Series

Premier runners-up, Kazumasa Sakai madak 21-5 21-16 agi takok nguogo.

Indonesia Open champion K Srikanth main draw mezüngbuba round nung Kan Chao Yu den asayatsü. Chinese Taipei nungba yagi Australia nunger Jacob Schueler 21-15 21-8 agi akok aser iba sülen Chinese Taipei nunger asayar Chun-Wei Chen 21-15 23-21 agi koka Srikanth den asayatsüba maongka ngutetogo.

HS Prannoy shibai taoba

hopta Indonesia Open nung Olympic silver medallist Lee Chong Wei aser Rio gold medallist Chen Long na koka liasü, pa main draw nung indang indanga asayatsü asoshi maongka nguogo aser England nunger Rajiv Ouseph den mezüngbuba asaya asayatsü.

India nunger asayar Siril Verma-a Indonesia nunger asayar Yehezkiel Fritz Mainaky 21-9 21-9 akokba sülen Shreyansh Jaiswal 21-16 21-15 agi koka main draw nung asayatsü asoshi jenjang ngutetogo.

Tetsürtem kicha asaya qualifying round nung India tsür Ruthvika Shivani Gadde-i Australia tsür Sylvina Kurniawan 21-15 21-15 agi koker maneni Ruwindi Serasinghe 21-9 21-7 agi koka main draw nung asayatsü asoshi maongka ngutetogo.

Shivani China tsür Chen Xiaoxin den asayatsü.

India nunger asayar Saina Nehwal, P V Sindhu, Sai Praneeth nunger ajak asüng nungi asaya tenzüksü.

Kohima Town Club-i sangdonger

Dimapur, June 20 (TYO): Kohima Football League, 2017 nung shilem agitsüpurtem atema Kohima Town Club-i guideline itemi agütsür:

Team/ Club tem ajak sen 500 agütsür Kohima District Football Association (KDFA) kübok züngoksemtsü nungdaker. Iba maparen inyaksü asoshi 2017 June 24 tatembangbuba anogo asütsü.

Asayartema KDFA kübok züngoksemtsü nungdaker aser iba atema nisungshia sen 50 agitsü. Asayartem züngoksemtsü asoshi tatembangbuba anogoji June 30 nü asütsü. Iba asoshi form anaprongla Technical Head

KTC (9862835381) William Koso mesera Sports paradise nungi angutsü.

Kohima Football League 2017 atema Team/Club shia nung asayartem ishiba agi 25 alitsüla aser timba agi asayar 40 asütsüla.

Team/Club ka nung tangalen nungi asayar timba agi 4 anika asayatetsü. Tanga state nungi asayartem interstate transfers mesera loan paper tejangja bener league o league na tsüngda alitetsü.

Team/Club shia nungi tongteprateptsü asoshi "Media Officer" tekaraba nung shimtsü nungdaker ta Kohima Town Clubi metetdaksüogo.

India o Canada na Davis Cup Edmonton nung asayatsü



New Delhi, June 20 (Agencies): India aser Canada na Davis Cup World Group Play-Off Edmonton, Northlands Coliseum nung taküm September ita asayatsü.

Iba asaya ya India aser Canada na tsüngda mezüngbuba asaya asütsü. Canada ya seeded team ka lir aser India dang nung jenjang temaba nung aliba ajanga parnoki iba asayamong host asütsü asoshi temeden nguogo.

"India aser Canada na tsüngda Davis Cup Play-Off, Canada, Alberta, Edmonton, Northlands Coliseum indoor court nung September 15 nungi 17 tashi asayatsü," ta All India Tennis Association sangdong ka ajanga metetdaksü.


Iba asaya tokoker telok ya 2018 World Group-i ajungkettsü.

Taküm küm tetenzüklen Bangalore nung India team-i Uzbekistan 4-1 agi koka playoffs round tongtet. Parnoki tang agi küm pezübuba adonga playoffs round tongtetogo.


London nung playoffs atema draw asüba mapang India nunger temaba jenjang nung alir Argentina, Germany aser Czech Republic team den asayatsü mataba atema pelaa alitsü.

Yaküm playoffs nung India nungeri 0-5 agi spain mekoki liasü. Iba asaya akokba ajanga parnok quarter-finals tongtet saka Novak Djokovic-i aniba Serbia tema-i 4-1 agi parnok madak takok angu.

Spain nung Jose Mourinho-i Tax magütsüba ajanga aitsü; Ronaldo okadak-i jaoka lir



Jose Mourinho



Cristiano Ronaldo

Madrid, June 20 (Agencies): Manchester United manager, Jose Mourinho-i Real Madrid nung coach inyakba mapang tax magütsütsü mechi tiazü mapa inyakba ajanga ken o benok, ta Spain nung sorkar tenüng nung ken o jembir ajanga Mongulbarnü ashi.

Portugal nunger manager, Mourinho-i Spain nunger tax ketdangser nem sen million \$3.7 agütsütsü lir aser iba ken o ya local court ka nung agütsüogo, ta Spain nung prosecutor-i ashi.

Mourinho-i 2013 küm Real Madrid toktsü aser Chelsea telok nung manager inyakba sülen 2016 küm Manchester United nung oa aden.

2011 aser 2012 mapang ozüng alema pa indang noksa ajanga aazükba rongsen temai madokdaksütsü mechi Spanish incom tax dang item senotsü memetetdaksü, ta prosecutor-i ashi.

Spain nung Mourinho indang tax ken o tembanga pa dang 2014 küm sen 1.15 million euros

senchi achi. Saka iba ken o atema pai kuli tai agütsüba putet, ta prosecutor temi ashir.

Spain nung football asayar aika anema tax ketdangser ashioktsüba ken o jembiba mapang Mourinho indang ken o adokogo.

Real Madrid telok nungi football asayar Cristiano Ronaldo-i 2011 aser 2014 küm tsüngda pa-i aazükba sen tax ketdangsertem dang meimzuka ayuba ken o nung ajemdaker July 31 nung kuli agütsütsü jaokogo.

Mourinho aitsüba aser Ronaldo jaokba otsü nung Real Madrid-i tang tashi o kata shia mali.

Portugal linük nungi football asayar mongin, Ronaldo-i Spain nung tax ketdangser nem tax sen million \$16.5 magütsü, ta ken o benoka aliba nung kuli agütsütsü asoshi Spain nung aliba okadak-i jaok.

Arishi küm 32 tain, Ronaldo anema ken o pezü benoka lir aser item rongnung pai tax magütsütsü mechi tanga linük

nung 2011 aser 2014 küm tsüngda taila company balala tenüng amshi, ta aija lir.

Ronaldo anema ken o angadanga sentong ya 2017, July 31 anepdang 9:00 ako nungi tenzuka Pozuelo de Alarcon court nung agitsü, ta osang ajanga ashi.

Forbes magazine ajanga sangdongba nung saisaponger rongnung Ronaldo-i aazükba sen timba lir, ta sangdonga lir aser sorkar tenüng nung ken o jembir temi ashiba agi, pai tax magütsütsü mechi British Virgin Islands aser Ireland nung aliba company ana tenüng amshi.

World Player of the Year sempet pezüben ngua alisang, Ronaldo-i taoba hopta nung, pa kicha tai mali, ta shia lir aser iba ken o aliba ajanga pa Real Madrid doktsütsütsü amokmerenba osang angashiogog.

Pa ya Portugal linük tenüng nung tang Russia nung asayaba Confederation Cup nung shilem agir aser iba asayamong July 2 nung tembangtsü.



June 20 : Brazil tetsür team 2017 BRICS Games south China, Guangdong Province, Guangzhou nung asayaba mapang India tsürtem koker pelatepba noksa nung angur.

BILEMDANGANG

"Takok angur ka masü saka jenjang aketer ka akümtsü merangang".